

Til
Alver kommune
Pb. 4
5906 Frekhaug



Skjelanger 27.01.2022

Sak 21/10319-Skjelanger

Blom Fiskeoppdrett AS-Søknad om ny lokalitet for oppdrett av laks, aure og regnbogeaure ved Skjelanger i Alver kommune.

Merknader

Anlegget er tenkt plassert på ein stad der naturkreftene vil utsetja installasjonane for store påkjenningar. Dette kan medføre fare for havari og rømming av fisk.

Som grunneigar på Skjelanger har eg eigar og brukarrettar i tre lakseplassar i Mangerfjorden, mellom Eldsneset og Skålholmen. Dette er gamle rettar. Plasseringa av nøtene er dokumentert på kart over "Laxefangstredskabenes standpladse" av Fiskeriassistent kaptein Joh.O.Simonnes, Bergen i 1899.

Sjølv har eg fiska med 2 nøter ein del år fram til sjølaksefisket vart stengt for å redde villaksbestanden i mellom anna Vosso. Fangsten vart dokumentert i fangstdagbøker.

Anlegget vil koma i direkte konflikt med lakseplassane på Sandvikneset og Kolevika. Forankringspunkt/ forankring vil bandleggja store område. Mellom anna der eg legg ut ilar til laksenøtene. Dette kan føra til slitasje og gnag på iletau, med påfølgjande havari for nøtene. Anlegget vil også føra til støy og uro som vil vera øydeleggjande for laksefisket. Villaksen er var for støy og uro når han på fjærande sjø lar seg driva med straumen langs land utetter fjorden, på leit etter mat.

Laksefisket har vore stengt dei seinare åra avdi laksestammen er på eit historisk lavmål. Dette kan ikkje brukast som argument for å sjå vekk frå historisk bruk og gamle rettar til laksefise på staden.

Lakselusproblemet for utvandrande smolt, og yngel/småfisk av sjøaure, som allereie er svært truga, vil med eit nytt stort oppdrettsanlegg verta forverra. Villaks som er på innsig, eller oppheld seg i fjorden vil og verta utsett for meir lakselus.

Det er gjort mange observasjonar av oter ved Sandvikane dei seinare åra. Spesielt ung oter. Om det har vore yngling her, kan eg ikkje slå fast. Her er ferskvassdammar som ligg rett oppanfor flomålet, der oteren kan vaska saltet ut av pelsen.

Furuskogen langs sjøen ved Sandvikane er ein viktig tilhaldsstad for den lokale hjortestammen på dagtid. Støy og uro frå eit oppdrettsanlegg rett utanfor vil vera negativt for hjorten som har fått vera i fred her.

Dei store kamskjelførekomstane langs land kan verta skadelidande av forureining av kopar, kjemikaliar, medsinar, fekaliar og forrestar frå anlegget.

Av ovannemde grunnar går eg imot at det vert gjeve løyve til eit nytt oppdrettsanlegg her i Mangerfjorden. Eg kan ikkje akseptera plassering av oppdrettsanlegget som omsøkt, avdi det vil fråta meg og bygda mogelegheita til å fiska laks med fastståande reiskap, på 2 gode lakseplassar.

Med venleg helsing

Bernt Karstein Skjelanger

Bernt Karstein Skjelanger